

Empat Sifat Mulia

Daripada Abdillah bin Salam RA berkata bahawa Rasulullah SAW bersabda:

يَا أَيُّهَا النَّاسُ، أَفْشُوا السَّلَامَ وَصَلُّوا الْأَرْحَامَ، وَأَطْعِمُوا الطَّعَامَ، وَصَلُّوا بِاللَّيْلِ
وَالنَّاسُ نِيَامٌ، تَدْخُلُوا الْجَنَّةَ بِسَلَامٍ

Maksudnya: “Hai manusia, berilah salam, hubungkanlah tali persaudaraan, berilah jamuan makan, solatlah pada malam hari ketika manusia sedang tidur; nescaya kamu masuk syurga dengan sejahtera.”

Riwayat al-Tirmizi (1855) dan beliau mensahihkannya

Pedoman dan Iktibar Hadis

Antaranya:

1. Hadis ini merupakan ucapan sulung Rasulullah SAW tatkala Baginda berhijrah ke Kota Madinah. Ucapan ini seolah-olah menjadi dasar negara Islam pertama dalam konteks hubungan dan kerana dua tali tersebut.
2. Apabila dipelihara dengan sebaiknya, sudah tentu menjadikan seseorang individu yang berada dalam kelompok masyarakat tersebut mencapai tahap puncak kebahagiaan, keamanan, ketenteraman dan merasakan bahawa ia dapat mentahqiqkan sebagai hamba Allah dengan menunaikan segala amanah untuk melayakkan dirinya menjadi khalifah Allah di muka bumi.
3. Prinsip yang diutarakan kepada masyarakat Madinah bertunjangkan kepada mahabbah dan sifat *tadhiyyah* (pengorbanan) yang sudah tentu boleh melahirkan masyarakat yang begitu ampuh dan bersatu padu.

4. Hal ini telah terbukti apabila generasi sahabat yang dipimpin oleh Rasulullah walaupun mempunyai latar belakang yang berbagai bangsa dan qabilah serta suku tetapi mereka tidak boleh dipisahkan dengan unsur-unsur asabiyah ataupun loghat bahasa dan warna kulit.
5. Semuanya di bawah payung yang satu tauhid dan merealisasikan maksud iman yang sebenarnya dalam kehidupan mereka. Rasulullah SAW menyebut empat perkara:
 - i. Menyebarkan salam. Sudah tentu ini menjadi syiar dan lambang pengucapan yang baik antara orang Islam sesama mereka dan lebih penting lagi doa mereka dimakbulkan tuhan sehingga jadilah mereka sentiasa mendapat keselamatan dan rahmat daripada Allah SWT berdasarkan kepada maksud salam itu sendiri.
 - ii. Bersilaturahmi kerana ia boleh mengeratkan hubungan kekeluargaan dan mengabaikan segala perselisihan kecil dan remeh temeh ataupun yang besar. Silaturahmi merupakan hak kekeluargaan yang wajib dipelihara dan dijunjung supaya selamat daripada kemurkaan Allah dan balasan yang pedih pada hari akhirat. Benarlah sabda Nabi SAW:

لَا يَدْخُلُ الْجَنَّةَ قَاطِعٌ رَحِمٍ

Maksudnya: "Tidak masuk syurga orang yang memutuskan silaturahmi."

Riwayat al-Bukhari dan Muslim

- iii. Memberi makan, lebih-lebih lagi kepada golongan fakir miskin, anak yatim dan mereka yang amat memerlukan. Di samping ianya merupakan tanggungjawab muslim bahkan ianya juga sebagai tanggungjawab kemanusiaan kerana seluruh manusia amat bencikan kelaparan dan kebuluran. Justeru, dengan sikap seperti ini boleh menambahkan ikatan kasih sayang dan penghormatan sesama manusia.
- iv. Qiyamullail, kerana ia merupakan jambatan dan hubungan dengan pencipta yang Maha Agung. Di kala manusia dibuai mimpi indah bersifat dengan sifat seperti orang yang mati kerana tidur, terdapatnya sekelompok manusia yang beriman dan bertakwa bangkit dan menjauhkan daripada hamparan tempat tidurnya. Semata-mata beribadat dan mengabdikan kepada Allah yang ghaib sebagai tanda melambangkan kesyukuran dan kepatuhan kepada-Nya.

Mutiara Hikmah

- ❖ **Pujangga berkata:** Dahulukan mengucap salam, ucapkan selamat dengan senyum, tumpukan perhatian anda kepada mereka agar anda menjadi orang yang sangat mereka cintai dan dekat dengan mereka.
- ❖ **Pujangga berkata:** Keuntungan yang hakiki adalah husnul khatimah, ucapan yang benar, amalan yang baik dan jauh dari kezaliman dan memutuskan silaturahim.

Kisah Teladan

Dalam *Sahih Muslim* diriwayatkan dari Amr bin al-As RA bahawa tatkala kematian menghampirinya di Mesir, dia memalingkan wajahnya ke dinding dan menangis, padahal dia adalah sahabat Rasulullah SAW dan telah banyak berjasa terhadap Islam dan kaum muslimin.

Kemudian datanglah anaknya Abdullah RA seorang sahabat alim lagi zuhud, untuk mententeramkan jiwa ayahnya agar sentiasa bersangka baik kepada Allah SWT dan berkata: Wahai ayahku, mengapakah engkau masih menangis? Wahai ayahku bukankah engkau sahabat Rasulullah SAW, bukankah Baginda telah melantikmu sebagai pemimpin pasukan dalam perang Dzat al-Salasil? Bukankah Baginda telah memujimu dahulu? Bukankah engkau bersahabat dengan Abu Bakar al-Siddiq dan Umar bin al-Khattab? Bukankah engkau penakluk negeri Mesir? Bukankah engkau telah berjihad dan bukan kamu telah melakukan segala kebaikan itu?

Semakin panjang perkataan anaknya itu semakin keras pula tangisan Amr bin al-As RA. Lalu ia berkata: Wahai sekalian umat manusia, sesungguhnya aku telah melalui fasa hidupku dalam tiga peringkat. Sekarang aku akan menjelaskan pada kamu.

“Semasa jahiliyah, aku tidak mengenal Islam dan aku adalah orang yang paling membenci Rasulullah SAW. Demi Allah, seandainya ketika itu aku berkesempatan membunuh, sudah pasti aku lakukan. Oleh itu, sekiranya aku mati dalam keadaan

demikian, pastilah aku termasuk penghuni neraka jahanam.”

Kemudian di anugerahkan Allah untuk melakukan agama Islam dan aku berhijrah dari Mekah ke Madinah. Aku ingin berjumpa Rasulullah SAW dan ketika itu Baginda berada di Masjid Nabawi. Sebaik sahaja melihatku, Baginda menyambut kedatanganku dengan ramah, senyum dan senang hati. Ini merupakan sambutan yang amat luar biasa dan penuh bermakna dalam diriku, lantas baginda bersabda:

حَيْهَلَا يَا عَمْرُو

Maksudnya: “*Dekatlah kepadaku wahai Amr.*”

Amr RA menyambung ceritanya: Setelah itu, aku sentiasa bersahabat dengannya dan aku menjaga persahabatan ini. Demi Allah pandangan mataku tidak pernah menatap Rasulullah SAW secara langsung kerana aku berasa malu dan segan dengan kewibawaannya. Demi Allah, sekiranya kalian memohon kepadaku supaya menceritakan sifat dan ciri-ciri Rasulullah SAW, tentulah aku tidak dapat melakukannya. Alangkah bahagiannya diriku, jika aku mati dalam keadaan seperti itu! Dengan demikian, besar harapanku bahawa aku termasuk ahli syurga.

Tetapi ternyata usiaku masih panjang dan aku tidak wafat bersama Rasulullah SAW sehingga urusan duniawi telah menghancurkan jalan hidupku. Sekarang aku tidak tahu adakah aku dijemput masuk syurga atau dicampakkan ke dalam jurang neraka. Aku tidak mempunyai amal selain dapat mengucapkan dua kalimah syahadah. Inilah persediaanku untuk berhadapan dengan Allah di hari kiamat, dan inilah yang hanya boleh kubanggakan!

Setelah Amr bin al-As RA berkata demikian, dia pun wafat dengan membaca kalimah tauhid tersebut. Anaknya Abdullah menceritakan: Ketika kami ingin memandikan, kami cuba beberapa kali untuk melepaskan genggamannya itu, setiap kali kami berusaha melepaskannya, maka pada saat yang sama ia kembali seperti asal. Kami biarkan tangannya tergeggam sehingga mengkafaninya, menyembahyangkan dan mengebumikannya dalam keadaan demikian.